



2^{DA} SESSIONE URDINARIA DI U 2024
RIUNIONE DI I 26 È 27 DI SETTEMBRE DI U 2024

2^{ÈME} SESSION ORDINAIRE DE 2024
RÉUNION DES 26 ET 27 SEPTEMBRE 2024

N° 2024/O2/055

Question orale déposée par Mme Josepha GIACOMETTI-PIREDDA

OBJET : PULITICA LINGUISTICA

Signore Presidente di l'Esecutivu,

« Bocca di Saint'Antoine, San Flurenzu, Vivariò, Venacù, San Pedro di Venacu, Ricante » è altri strani « hybrides » chè n'avemu vistu sfilà sottu à i nostri ochji pè ste strade. Tanti ritratti di panelli stradali nantu à e rete suciale, ancu qualchì « fake » pè scherzu. Mà pè disgrazia a realtà ùn avia bisognu d'esse sbagliata per esse pessima.

A mezu tutti i trapazzi, chè no campemu, omu sì pò dì chì l'affare ùn hà tantu primura.

E nostre difficoltà sò numerose, mà in qualchi parolle st'affare vale quantunque d'esse incalcata è tene a sò primura.

A tupunimia, traduce una cartugrafia mentale. Numinà un locu, identificallu, ghjè à tempu di a so memoria, cuntà a so storia.

A tupunimia, intreccia lingua, omu, terra, memoria. Dice una parte maiò di l'essezza di un populu.

A tutte l'epiche, quelli ch'anu vulsutu impatrunescesi di un locu, in Corsica cume in altrò, anu circatu à sguassà a memoria, in l'almanacchera, l'assestu è a sguassera di un territoriu, campatu, praticatu dà l'omi di quì.

A tupunumia, tene una parte maiò di ciò chè no simu.

Perquessa chì, u movimentu naziunale nè hà fattu una rivendicazione di primura di una pulitica à prò di a nostra lingua.

Pè dà un solu esempiu, di lugliu 91 decine di panelli eranu stati lampati davanti a priffittura d'Aiacciu pè dumandà a « Cursizazione di i tupunimi ». Seguitaranu qualchì azzuffi è ancu interpellazione di militanti.

Oghje à chì simu ?

Semu chjari, un sbagliu tutt'ognunu u pò fà è à tutti i livelli. Di più, ùn vogliu participà à mette in accusu un funziunariu, un serviziu di sta culletività, chì serianu i pagherini.

L'interrugazione, si porta nantu ciò chì stu disfunziunamentu palesa à u fondu è apre nantu à un quistiunamentu chì tocca à u sensu.

Chì mezi reali sò dati, à livellu finanziariu, umanu, mà dinò in termini d'urrganizazione à a pulitica linguistica ?

Ci hè statu un spaziu di discussione pè sgaggià una forma di « duttrina », di scelta di tene un bislinguisimu « Tuscanu-Francese/ Corsu », puru s'ellu hè un antru dibattitu ?

Ci hè un cuntrollu è una validazione di l'urtugrafia ?

Ci hè una cunsultazione di l'Università di Corsica nantu à e quistione linguistiche ?

Esiste sempre u « Cunsigliu di a lingua » ?
Chì sò e so missione ?

In due parolle, qualessa hè oghje a pulitica lingusitica di a Culletività di Corsica ?

Infine, st'interrugazione palesa un sistema, una logica, un quistiunamentu chì vò à di là di a pulitica linguistica cuncipita à u sensu strettu.

Stu quistiunamentu hè per noi sempre listessu, eri cume oghje, in a maiurità o in l'uppusizione. Bisognu à esse un quistiunamentu cumunu, di regula.

Chì postu hè datu oghje, à livellu di sta culletività, à u sensu di l'indiattura naziunale in ogni actu, da u più maiò à u più minimu, cù i mezi chì sò quelli d'oghje ? Sapemu ch'ellu ci ne vulerà di più, mà avà chì s'è po fà, chì si face ?

Semu in carica quì di l'interessi materiali è murali di u populu corsu.

Chì sensu hè datu à ogni actu di st'istituzione chì ci pò permette di di in ogni duminiu, di modu serenu è determinatu : eccu ciò chè no simu, eccu ciò chì per noi hà primura, eccu ciò chè no femu cù i tutti i mezi chì oghje avemu pè mantenellu è fallu cresce.